

# Powšitkowne WOZJEWJENJA

njedźelu, 28. měrca 2021

## Přiležnosć k swjatej spowědži w Róžeńće

**póndźelu, 29. měrca**      farar M. Anders (w kapale),  
18.30 – 19.30 hodź.      farar T. Dawidowski (na chórze),  
farar dr. B. Dittrich (we wěži)

**wutoru, 30. měrca**      farar M. Anders (w kapale),  
18.30 – 19.30 hodź.      farar dr. M. Kleiner (na chórze),  
farar G. Warnar (we wěži)

Kóždu sobotu je do Božeje mše za lud a kraj, kotraž so we 8 hodź. zahaji, přiležnosć k swjatej spowědži.

## Wusyłanje Božich mšow

Serbskorěčnu Božu mšu móža wěriwi tutu njedźelu, 28. měrca znowa jako livestream w interneće scěhować. Dupołdnja w 9 hodź. přenjese so wona z Chróšćanskeje, dalša hižo we 8.30 hodź. z Kulowskeje cyrkwyje. Z wobeju cyrkwjow přenjesu so tež Bože služby wot zeleneho štwórtka hač do jutrowneje póndžele. Z Chróšćic přenjesu so kemše zeleny štwórtk, 1. apryla, w 20 hodź.; liturgija wulkeho pjatka, 2. apryla, w 15 hodź.; jutrowna nóc sobotu, 3. apryla, w 20 hodź. – zdobom po žołmach serbskeho rozhłosa –, jutrońčku kaž tež jutrownu póndźelu, 4. a 5. apryla, w 9 hodź. Z Kulowa přenjesu so kemše zeleny štwórtk, 1. apryla, w 19 hodź.; liturgija wulkeho pjatka, 2. apryla, w 15 hodź., jutrowna nóc sobotu, 3. apryla, w 20 hodź., jutrońčku, 4. apryla, w 9 hodź. a jutrownu póndźelu, 5. apryla, we 8.30 hodź. Linki budžeja aktualnje na internetowymaj stronaj [www.posol.de](http://www.posol.de) kaž tež Chróšćanskeje wosady wozjewjene.

## Křižowy puć dekanatneje młodžiny

Dekanatne dušepastyrstwo za młodžinu přeprašuje młodostnych na zhromadne modlenje křižowego puća, a to tutu njedźelu, 28. měrca, do Wotrowa. Započatk je w 14 hodź. při sportnišću. Wšitcy su wutrobnje přeprašeni.

## Hudźbne wobrubjenje Božich službow

Hudźbnicy a spěwarjo Serbskeho ludoweho ansambla wobrubja w martrownym tydžej a na jutrownej póndželi Bože služby we wšelakich serbskich katolskich wosadach: zeleny štwórtk, 1. apryla, w 20 hodź. w Chróšćicach a w samsnym času we Wotrowje; liturgiju wulkeho pjatka, 2. apryla, w 15 hodź. w Chróšćicach; jutrownu póndźelu, 5. apryla, w 7.30 hodź. w Zdžeri, we 8.30 hodź. w Ralbicach, w 9 hodź. a w 10.30 hodź. w Radworju kaž tež w 10.30 hodź. w Rakecach.

## **Konrada Adenauerowa založba wěnuje so serbskim temam**

Pod hesłom „Serbja we Łužicy. Drěmacy pokład w Sakskej?“ přeprašuje Politiski klubanski forum Sakska Konrada Adenaueroweje založby na rjad onlinowych zarjadowanjow z diskusiju. Wone wotměja so na štyrjoch wječorach, stajnje wot 18 hodž. přez platformu Zoom. Prěnje budže srjedu, 31. měrca, na kotrymž porěčitaj rěčespytnica dr. Jana Šołćina z Budyskeho Serbskeho instituta a nawoda Budyskeho Serbskeho gymnazija René Wjačlawk k temje „Wysokoněmsce, saksce – serbsce? Rěč a identita we Łužicy“. Ze zarjadowanjemi pokročuje so na slědowacych srjedach: 7. apryla přednošujetaj Chróšćanski farar Měrcin Deleńk a jednačel Budyskeho Ludoweho nakładnistwa Domowina Pětr Syman Cyž ke „Křižerjam a ptačemu kwasej. Serbska kultura mjez pandemijowym modusom a staroscemi wo eksistencu“. 14. apryla wěnujetaj so Marja Michałkowa, něhdyša zapóslanča Zwjazkoweho sejma a něhdyša předsydky Rady za serbske naležnosće Sakskeho krajneho sejma, kaž tež Slepjanski wjesnjanošta Jörg Funda k temje „Jedyn lud, jedyn hłos!? Politiska participacija Serbow w Sakskej“. Hosćo poslednjeho zarjadowanja 21. apryla pod hesłom „Młodži a dynamiscy. Perspektiwy do přichoda za Serbow“ budu předsyda Domowiny Dawid Statnik kaž tež Helena Hejduškec a Jakub Wowčer ze Serbskeho młodžinskeho towarstwa Pawk. Za kóžde zarjadowanje je přizjewjenje trěbne. Z wobkrućenjom dóstanu zajimcy potom tež přistup připóslany. Link na stronu k přizjewjenju je pod [www.posol.de](http://www.posol.de) wozjewjeny.

## **Serbske kemše w Drježdžanach**

Drježdžanscy Serbja su na maćernorěčne Bože mšě do cyrkwy swjateho Antonija w Drježdžanach-Löbtauwje, Bünauska hasa 10, přeprašeni. Kemše budže farar Gabriš Nawka stajnje njeźelu, 11. apryla, 4. julija a 12. septembra, swječić, dalokož to postajenja dowola.

## **Caritas testuje na wsach na koronu**

W přichodnych dnjach testuje Hornjołužiski zwjazk Carity na serbskich wsach ludži na koronu. Póndźelu, 29. měrca, steji mobilny team wot 8 do 9.30 hodž. w Njebjelčicach při Heldec hospodže, wot 10 do 11.30 hodž. w Róžeńće při gmejnskim zarjedže, wot 12 do 13.30 hodž. we Worklecach při hornim wjesnym haće a wot 14 do 15 hodž. w Chróšćicach při „Jednoće“. W Pančicach-Kukowje budže team zeleny štwórtk, 1. apryla, wot 10.45 do 12.30 hodž. při gmejnskim zarjedže k dispoziciji stać. W Smochčanskim kubłanišću swjateho Bena testuje Caritas na wjacorych dnjach. Tam ma wona jedyn ze štyri testowanskich centrow. Do toho měli pak so přizjewić. Link k tomu je pod [www.posol.de](http://www.posol.de) podaty.